



TEKS
KHUTBAH
NEGERI PAHANG
DISEMBER 2025



OPERASI SELAMAT PARU-PARU

12 DISEMBER 2025M | 21 JAMADILAKHIR 1447H

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ
سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يُضِلِّ فَلَا هَادِيَ لَهُ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فَيَا عِبَادَ اللَّهِ، ، اتَّقُوا اللَّهَ وَأُوصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah Taala dengan melaksanakan segala perintah dan meninggalkan segala larangan-Nya. Mudah-mudahan kita diberkati Allah Taala di dunia dan akhirat.



Sidang Jemaah Yang Dimuliakan,

Pada hari ini, mimbar memberi peringatan mengenai bahaya merokok dan vape yang kini mengancam ummah, khususnya anak-anak muda kita.

Perbuatan merokok dan menghisap vape bukan sekadar tabiat, tetapi perangkap syaitan yang perlahan-lahan merosakkan kesihatan, kewarasan dan keimanan. Tinjauan Kesihatan dan Morbiditi Kebangsaan 2022 menunjukkan peningkatan penggunaan vape dalam kalangan remaja daripada 9.8% pada tahun 2017 kepada 14.9% pada tahun 2022. Kita tidak mahu melihat generasi pewaris negara ini menjadi lemah tubuh, jiwa dan cita-cita akibat ketagihan terhadap nikotin dari penggunaan produk merokok.

Firman Allah Taala dalam Surah al-Baqarah, ayat 195:

أَعُوذُ بِاللَّهِ مِنَ الشَّيْطَانِ الرَّجِيمِ

وَأَنْفِقُوا فِي سَبِيلِ اللَّهِ وَلَا تُلْقُوا بِأَيْدِيكُمْ إِلَى التَّهْلُكَةِ وَأَحْسِنُوا إِنَّ اللَّهَ يُحِبُّ الْمُحْسِنِينَ ﴿١٩٥﴾

Yang bermaksud: *"Dan belanjakanlah (harta bendamu) pada jalan Allah, dan janganlah kamu jatuhkan dirimu sendiri ke dalam kebinasaan dengan tanganmu sendiri, dan berbuat baiklah, kerana sesungguhnya Allah menyukai orang-orang yang berbuat baik."*

Ayat ini jelas menegaskan agar kita tidak mencampakkan diri kita ke dalam kebinasaan. Merokok dan vape, dengan segala bahan kimia berbahaya yang terkandung di dalamnya, secara terang-terangan menjerumuskan diri kita kepada pelbagai penyakit kronik. Bayangkanlah paru-paru yang sihat, dirosakkan oleh tar, nikotin, dan bahan toksik lain. Elakkanlah perbuatan yang akan menyebabkan



jantung menjadi lemah, risiko kanser meningkat berkali ganda, dan pelbagai penyakit pernafasan menghantui hidup.

Lebih membimbangkan, rokok dan vape bukan sahaja memudaratkan diri perokok, bahkan turut memberi kesan buruk kepada orang di sekeliling melalui "asap sekunder" atau "*second-hand smoke*". Ingatlah perbuatan yang menyebabkan masyarakat sekeliling terpaksa menghirup udara yang tercemar, dan meningkatkan risiko penyakit akibat pendedahan kepada asap rokok atau wap vape adalah satu dosa.

Dari sudut agama, keputusan Muzakarah Kebangsaan Hal Ehwal Islam dan Fatwa Negeri Pahang mengharamkan rokok termasuk rokok elektronik atau vape berdasarkan dalil-dalil syarak yang melarang sesuatu yang memudaratkan diri dan harta. Merokok adalah perbuatan membazirkan harta pada perkara yang sia-sia dan membawa mudarat, sedangkan Allah Taala berfirman dalam Surah Al-Israa', ayat 26-27 yang bermaksud: "*...dan janganlah engkau membelanjakan hartamu dengan boros yang melampau. Sesungguhnya orang yang boros itu adalah saudara Syaitan, sedang Syaitan itu pula adalah makhluk yang sangat kufur kepada Tuhannya.*".

Menyedari akan ancaman besar ini, Kerajaan Malaysia telah menggubal Akta Kawalan Produk Merokok Demi Kesihatan Awam 2024 (Akta 852) yang telah mula dikuatkuasakan pada 1 Oktober 2024. Akta ini merupakan satu akta yang komprehensif, bertujuan untuk mengawal selia semua jenis produk merokok termasuk rokok konvensional dan rokok elektronik atau vape.

Bagi memperkukuhkan penguatkuasaan Akta ini, satu operasi iaitu Operasi Selamat Paru-Paru telah dilancarkan secara meluas baru-baru ini di seluruh negara. Pelancaran Operasi ini melibatkan kerjasama erat antara Kerajaan



Persekutuan, Kerajaan Negeri dan Badan Bukan Kerajaan (NGO) . Operasi ini juga bukan sekadar kempen, tetapi satu usaha penguatkuasaan bersepadu yang memfokuskan kepada dua aspek penting:

1. Kawalan terhadap produk rokok, termasuk pendaftaran, pengiklanan, promosi dan tajaan, kawalan penjualan, kawalan harga, pembungkusan dan pelabelan semua jenis produk merokok termasuk rokok elektronik atau vape;
2. Penguatkuasaan terhadap amalan merokok merangkumi Seksyen 16 dan 17 Akta 852 yang berkaitan dengan larangan merokok di kawasan larangan dan larangan merokok bagi individu bawah umur.

Sidang Jemaah Yang Dirahmati Allah,

Pelaksanaan Akta ini dan Operasi Selamat Paru-Paru adalah manifestasi keprihatinan terhadap masa depan anak bangsa. Sekiranya berjaya, ramai anak muda yang boleh diselamatkan daripada menderit penyakit, dan banyak keluarga yang boleh hidup lebih bahagia tanpa beban penyakit dan perbelanjaan perubatan yang tinggi.

Usaha mencegah ini adalah tanggungjawab bersama, sama ada kerajaan mahupun masyarakat. Sebagai masyarakat, beranilah menegur dan melaporkan sekiranya melihat penjualan produk ini kepada golongan di bawah umur. Jangan biarkan anak-anak kita menjadi mangsa budaya ketagihan yang merosakkan.



Setiap tahun, dianggarkan 24 ribu rakyat Malaysia terkorban akibat penyakit berkaitan amalan merokok. Bahkan ia menjadi sebab utama gejala penagihan dadah. Sehubungan itu, Kerajaan Negeri Pahang pada 1 Januari 2026 akan mengharamkan secara total penjualan rokok eletronik dan vape.

Marilah kita bersama-sama menyokong inisiatif murni ini. Jadikanlah setiap teguran dan tindakan kita sebagai jihad kecil demi menjaga kesihatan ummah. Lindungi paru-paru kita dan anak-anak kerana ini adalah amanah Allah Taala.

Sidang Jemaah Yang Dikasihi Sekalian,

Sebagai penutup, marilah kita mengambil iktibar daripada peringatan tentang bahaya merokok dan vape. Semoga ia menggerakkan hati kita untuk menjauhi kemudaratannya ini dan menjadi contoh yang baik kepada ahli keluarga dan masyarakat. Sokongan kita terhadap Akta Kawalan Produk Merokok 2024 dan Operasi Selamat Paru-Paru adalah bukti keprihatinan kita terhadap masa depan generasi akan datang.

أَعُوذُ بِاللَّهِ مِنَ الشَّيْطَانِ الرَّجِيمِ

وَتَعَاوَنُوا عَلَى الْبِرِّ وَالتَّقْوَىٰ وَلَا تَعَاوَنُوا عَلَى الْإِثْمِ وَالْعُدْوَانِ وَاتَّقُوا اللَّهَ إِنَّ اللَّهَ شَدِيدُ الْعِقَابِ ﴿٢﴾



بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ
قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ،
وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.